


# HARANGVE DE M. PIERRE HARDIVILLIER,

Recteur de l'Vniuersité  
de Paris,

*Prononcee par luy au Parlement pour l'Vniuersité,  
contre les Peres & Escholiers du College de  
Clermont, le xxij. de Decembre 1611.*

Traduitte de Latin en François,

P. F. R. P.




A PARIS;

Chez MICHEL GADOVLEAV, & JEAN  
PETIT-PAS, demeurans rue de  
S. Iean de Latran.

---

M. DC. XII.

*Avec permission.*




AV TRES-ILLVTSRE  
 SEIGNEVR MONSEIG<sup>R</sup>,  
 Monseigneur Nicolas de Verdun, &  
 à Messeigneurs de la Cour,

PIERRE HARDIVILIER Recteur  
 souhaite l'immortalité.

**V** Oicy venir vers vous & en public la petite  
 deffence de l'Vniuersité de Paris, ( Equitables  
 Seigneurs ) marquee de vostre nom qui luy donne  
 renom, plus de lustre & de grace & à l'abry du-  
 quel elle prend l'essor; & pourquoy non ne volera-  
 elle pas aux yeux & dans les mains de tout le mô-  
 de sous l'air de vos conduittes, puis que vous estes  
 cause qu'elle a rempli l'aureille d'un monde d'audi-  
 teurs: certes i'ay songé fort long temps, si ie deuois  
 esclorre ce mien fruiet & le faire commun, & si ie  
 me fusse creu moy mesme, ie ne luy eusse iamais dō-  
 né la clef des champs, i' apprehendois pour luy, non  
 seulemēt la pince & le controole d'un iugemēt plus  
 raiss & plus ferme que le mien; mais aussi l'esguillō  
 & les piques du temps qui est aussi confus en iuge-  
 mēts & en affections qu'en affaires; mais si tost que  
 i'ay veu les fauorables rais de ceste Cour celeste, &  
 nommement le vostre ( Monseigneur de Verdun )  
 qui sont si salutaires à la France, il me semble que

i'ay senty dans moy nouveaux esprits & un nou-  
 uveau courage, qui m'a fait perdre le premier ressen-  
 timent de mon humble bassesse, & m'a fait oublier  
 la crainte des censeurs, & des dangers communs: le  
 voicy donc qui m'eschappe des mains, ce discours  
 que ie vous prononçay à l'audience deuant vos Sei-  
 gneuries & en pleine assemblee, il s'en va tesmoi-  
 gner de la fidelité & naturelle affectiō que ie porte  
 à mō pais & à ma mere l'Vniuersité, il court à l'ad-  
 uenture, mais bien deliberé, vigoureux, plein de vie  
 aux beneistes clartés du Soleil de Verdun, & sous  
 les influēces des autres luminaires de ce grand Ciel  
 François il est aussi naïf, aussi frāc & candidé en sa  
 natiuité qu'en sa conception sur le papier, que lors  
 que ie le traçois dans mon esprit. Receuez dōc tres-  
 illustre Verdun, le mignon de Themis, Poracle de la  
 Cour, l'ame du Parlement, receuez vous Iuges in-  
 corruptibles & gardiens fidelles des lys Frāçois les pa-  
 rolles, le cœur, & ce qui est de plus la bonne volon-  
 té de vostre Recteur, Recteur que ie dits vostre, ven  
 qu'il est le Recteur de ceste Vniuersité, qui est vraie-  
 ment & totallemēt vostre, puisque par vostre Ar-  
 rest elle est demeuree ferme & entiere sans tache &  
 sans macule, & d'autant qu'elle ne tient vie que  
 de vous, ie vous promets que ie feray reuiure en ses  
 registres vne eternité de iours, un faict si memora-  
 ble, & par les remerciemens gratulatories que vous  
 aurez de nous.





# HARANGVE DE MAISTRE

PIERRE HARDIVILLIER,

Recteur de l'Vniuersité de

Paris.

*Prononcée par luy au Parlement pour l'Vniuersité, contre les Peres & Escholiers du College de Clermont, le xxij. de Decembre 1611.*

**E**N fin (MESSIEURS) vous auez exaucé les vœux de nos François, & les requestes que maintefois les plus calmes esprits les plus rassis, & les plus espurés auoient iusques à ce iourd'huy lancé au tribunal de la diuinité sont renuoiez ça bas, pour receuoir de vous leur plain effect: Les voicy a la bouche de l'Vniuersité, elle qui trauessee selon les changements & les vicissitudes des temps calamiteux, elle qui affoiblie & comme clangourie par le dol & les ruses des ennemis couuerts: La voicy en personne deuant vne assemblee la plus auguste & la plus venerable, la plus entiere & la plus equita-

A

ble qu'ayt iamais veu le monde: La voicy elle mesme sur le theatre ou la Iustice avec la Verité deux Sœurs germanes & filles du grand Dieu, iouënt leurs personages, theatre ouuert aux oracles sacrez de la verité mesme, fermé au fard, au faste, aux aguets, aux embusches des esprits cauteleux: La voicy à vos yeux la Reine & la Princesse des Vniuersitez, l'vnicque & chere fille de nos Rois tres-chrestiens aux pieds de vos grandeurs; mais non plus de tel port, & de telle Maiesté qu'elle a esté iadis; non plus avec ce bras d'acier & ce corps vigoureux, non avec ses māmelles qui distilloient iadis vn fleuve de bon-heur & de prosperitez; elle n'a plus ses yeux esclairants & brillants, ses yeux estincelants, qui comme des estoiles embrasoient de leurs feux les plus masles poictirines des nations du monde; La voicy toute nuë; toute dolente & toute abandonnée, qui iette les abbois & les derniers souspirs dans la poussiere; & va trainant son aisse sur le fumier, & honteuse qu'elle est d'un si pitteux estat, ayant en queue, en teste, en flanc vne grande trainée de ses pauvres enfans, encore peu secouruë & soulagée de ses mesmes enfans; c'est en vous qu'elle attend, c'est en vous qu'elle espere & repos & soulas au

reſtaſſement de ſes honneurs & de ſes dignitez ; c'eſt vous qu'elle regarde les yeux baignez de pleurs , c'eſt vous qu'elle coniure comme Anges gardiens de ceſt Empire, & comme Dieux tutelaires des lettres ; car ſi vos charitables mains ne la retirent de ſes lieux limoneux où elle eſt embourbée, & que ſi les oracles de vos arreſts ne repouſſēt l'effort des maladies qui luy mangent le cœur & les entrailles, il n'eſt ia beſoin qu'elle recherche ailleurs vn autre lenitif pour ſes douleurs, elle ne doit attendre en telle extremité & en telle detreſſe autre pl<sup>e</sup> doux remede pour adoucir l'aigreur de ſon deſaſtre, & fomēter ſes playes que cclui-cy, qu'au pis aller la Court de Parlement aura donné l'oreille à ſes dernieres voix, aura ouuert la bouche à ſes derniers ſouſpirs, & qu'elle aura rendu entre vos bras, Meſſeigneurs, ceſte âme ſi innocente, ſi pure, ſi Françoisſe, en vn mot ſi luiſante de la blâcheur des lys.

L'eloquent Aduocat de nos parties donne commencement & ouuerture à ſon beau plaidoyer par la diſpute qui s'eſleua entre Ajax & Vlyſſe pour les armes d'Achille, ce qui me faiēt tomber ceſte penſee en l'eſprit, que l'Vniuerſité peut à bonnes enſeignes dire des leſuites, ce que diſoit Ajax de ſon

A ij



Vlyffe; qu'Vlyffe dompte Ajax, il aura ceste gloire d'auoir tiré des armes contre vn braue aduersaire.

Car qui ne void que l'Vniuersité est portée sur les rangs aux armes, aux alarmes, mais qu'elle desdaigne la lice, & de venir aux mains, elle qui est Royale, d'armes Royales, & de race Royale, avec ceux qui n'y a pas trois iours sont deguerpis des Cabannes champestres d'un Hospital, où de quelque coin d'Espagne, qui estât surmontez s'estimeront heureux, & feront trophée d'auoir mis en champ clos, en chaleur, en alarme la Roine & la Princesse des Vniuersitez. Mais de peur qu'en vne si dangereuse escrime les deshonnêtes brigues de nostre partie, & les tours de souplesses en leurs poursuites, & vn nombre innombrable de piperics nouuelles, & dont iamais les hommes n'auoiēt cogneu l'usage de la pratique, me mit quelque terreur Pannique au camp des Academiciens, & n'esbranla leurs esprits comme faict vn tonnerre ceux qu'il a foudroyez; voicy que tout soudain ou Dieu, ou vous, Messigneurs, auez choisi à l'Vniuersité vn Aduocat qui a les yeux partout, qui void de toutes parts, qui darde ses rayons, qui perce, qui penetre aux plis & aux



replis de leurs destours, & aux plus noires ombres de leurs cachettes, qui tranche de sa langue plus viuemēt que ne fist Alexandre de son espee, le nœud & l'embaras de leurs plus entortillées sophisteries; qui portant les flambeaux de son bien-dire, va guidant les François par des sentiers qu'il a frayé luy mesme, voire par les precipices, les gouffres, les abismes sans riuē ny sans fonds de la societé des Iesuites; lequel parlāt tousiours pour l'Vniuersité, il n'y a que tenir qu'elle sera tousiours ouïye & exaucée; lequel debout, elle sera sur pieds; qui plain de viē, donnera vie s'il peut; qui plain d'honneur & de candeur Françoisē redonnera s'il peut & honneur & candeur à l'Vniuersité sans borne de duree.

Et pourquoy nostre Vniuersité ne se vantera pas, ne s'esioüira pas, ne fera pas trophée d'auoir pour Aduocat, vn homme qui cognoit les oracles de la bonne Themis, qui est le truchemēt & fidelle interprète des plus sacrez arrests; & qui a feuilleté les arrests des Cours, les Edits des Rois, & les aduis des sages, & les autres parures du droict Ciuil, dont la robbe d'Astree est parsemée & diapree en guise d'Escarboucles & d'Esmeraudes: il semble que les graces luy ayēt

adjancé sur la teste vne couronne de fleurs de Rethoricque, esleué de trophées, & dressé des honneurs d'éternelle memoire; c'est vn filz de Pallas, vn nourrisson des Muses, que les mignardes Sœurs ont embelly des traicts, & des viues couleurs de leurs pinceaux. O Dieux! que nettement, que franchement, & que naïfucement il a représenté la verité, non releuée des ombres ou couleurs estrâgeres d'une morte peinture, mais a tiré au vif & au naturelle vray pourtraict de ses beautez; si bien qu'il sêble que i'aperçois desia sa viue image reluire aux cœurs des escoutans par la reflection de l'orateur, & ie m'aïseure que parmy ceste presse des assistants, personne ne setreuve, qui ne recoiue en l'âme le sens de ses parolles, ainsi que des oracles de la verité mesme, & qui n'estime que ce ne soit modestie à luy particuliere n'auoir pas esuenté, descouuert, mis au iour plus de matiere, côme il le pouuoit faire s'il eust voulu.

Or quand à moy, (Messieurs) qui m'apreste & m'aduance pour parler en telle sorte qu'il semble que ie doiue pleurer, non pas parler; donner place à mes cris plustost qu'à vn discours, & deffendre plustost la pieté que mon propre interest: i'apperçois en ma

cause vn point qui me trauerse & qui m'afflige, qu'il faut que ie combatte presentement, non pas a des hommes simplement, mais des hommes lettrez, non lettrez seulement, mais des hommes Chrestiens, & voire mesme les plus fameuses & renommes compagnies de la Chrestienté. Et peut estre icy les Hereticques, qui ainsi qu'oiseleurs sont tousiours aux aguets pour dresser des embusches aux ames Catholiques, prendront quelque sujet de seduire & broüiller les foibles ames d'vn menu peuple; mais l'importunité de nos parties nous reduit à ces extremitéz, qui tât de fois adouonnez par amour fraternelle de quitter leurs entreprises & les projets de leurs prentions, & retenir en bride le vol immodéré de leurs ambitions, tant de fois repoussez & rebuttez du milieu de nos foyers, n'ont eu se commander, ont mieux aymé aux despens mesme de toute charité, s'elancer sans les terres, dans les heritages, & dans les droicts d'autrui, que de brider leurs conuoitises.

Ainsi, Messieurs, outre les indignitez qu'ils nous font aualer, qui pourroit endurer que maintenant ils taschent à nous faire du mal, non par des espions, non par des ho-



monceaux, ou ennemis des Muses, ou ennemis du repos de la France, mais par vous mesmes, & nous battent sans cesse de vos menaces, vous qui estes les Peres & les Tuteurs de l'Vniuersité, & pensent, miserables, accabler du poids de vos balances, de l'exécution de vos arrests, & de la sainteté de vos diuins iugements, ceux de qui ils n'ont peu amortir le courage par secrets, monopoles, par stratagemmes, & trahisons sourdement complotées? Et d'autant que parmy leurs griefs, ils nous reprochét la solitude de l'Vniuersité, le desordre & meslange confus de nos classes, la trop grande licence de la jeunesse, comme si c'estoit là maladies populaires du corps Academicque, qu'un Roy & qu'une Cour, qu'un Edict, qu'un Arrest, ne seroient suffisants de medicamenter sans le secours de leur Societé, comme si Dieu nous l'auoit enuoyée à ces fins. Là dessus ie fais force, qu'encores que nous voyons que l'Vniuersité en telle extrémité court risque de sa vie, & tóbe en decadâce, il n'est ia besoin des seruiables mains de si reuerés Peres: car qui seroit celuy qui voudroit appeler des Medecins au secours & à l'ayde de l'Vniuersité, qui ont ce naturel d'auoir à cōtre-cœur, à desdaing, à mespris, toute au-

re compagnie qu'on sçait auoir couué, es-  
 los, & enfanté ceste volée de maladie, que  
 nous auons veu fondre & creuer sur nos  
 terres par leurs mauuais desseins, qui sont  
 aux enuirs de l'Vniuersité (gisante voire-  
 ment sur la couche d'vne angoisse mortelle,  
 qui tire à la fin, leur semble-il) ainsi que  
 des importuns qui font teste aux vieillards  
 pour attraper leurs biens, & pour se declarer  
 leurs heritiers, qui à peine le mort dans le  
 tombeau, les larmes essuyées, & le deuil  
 cheué, demandét l'arbitrage des funeraill-  
 es ainsi que corbeaux qui vont guettât la  
 proie, vont tousiours la gueule bée, &  
 mais ne retournent, si vous ne leur iettez  
 un morceau qu'ils espient.

On peut voir leurs desseins & sonder leurs  
 pensées, fouiller dans les ressorts & secrets  
 cabinets de leurs cabales par leurs mesmes  
 discours, on les peut veoir à l'œil, & les tou-  
 cher au doigt; si est-ce toutesfois qu'il me  
 uist bien de vous faire vn recueil, non pas  
 de leurs desseins, mais des euenemens de  
 leurs desseins, source de nos malheurs, veu  
 que le mal du temps m'en donne occasion,  
 les prises où le sort a ietté ces deux socie-  
 tés Iesuitiques, Academiques.

Je ne m'arreste pas à leur fondation, lors

que le Iesuisme estoit comme au berceau, qui plus il s'est accru, plus ont descreu les nostres; mais ces rabbais & ces descroissements, ce n'estoit presque rien, ou au moins n'estoient pas de telle conséquence que d'arrester le courant de sa gloire, ou reserrer l'estenduë de ses bornes, que de ternir le teint & la grace des Muses, & d'abattre le cœur & le soin laborieux des hommes tres-parfaits, qui auoient acquis le comble de toutes les sciences. Et pour dire en vn mot, c'estoit vne nuée qui ne paroissoit rien & estoit trop petite pour offusquer les rays d'vn tel Soleil qui rouloit dans le Ciel de l'Vniuersité. Mais ie viens maintenant à ses mortelles playes, & qui saignent, encore, que ces Peres tres-Saincts, & trop bons gardiens de leurs regles, nous ont fait ressentir au despourueu & loin de nos pensées.

A peine l'Vniuersité auoit leué la teste hors de l'orage & la tourmête de nos guerres ciuiles, & auoit esquiué le naufrage commun, non toutefois sans rien laisser du sien, & portant sur le sein vne parlante image de ses malheurs, rappeloit les Muses esgarées & vagabondes dans leur pays natal, & maisons naturelles que voicy sur le champ, ces Peres discrets, & qui flairent de loin l'eue-



remēt des choses, veirēt qu'on ne pouuoit  
 luy remettre les nerfs, luy remboiter les os,  
 & rallier les forces sans le secours & liberali-  
 té d'une Royale main, que toutesfois les  
 Professeurs de l'Vniuersité n'auoient ny  
 pensions, ny gages, ny soldes, qui sont les  
 nerfs de la nature humaine, l'esprit mouuāt  
 le nos esprits, & l'ame de nos ames, qui ma-  
 nie, qui remuë & qui branle tous les ressorts  
 de nos aduersitez; les voicy à main ioincte  
 & à genoux aux pieds du Roy tres-Chre-  
 tien, luy represente que puis qu'il entēdoit  
 que le bien de la paix fust vniuersel en son  
 Royaume, & que le plaisir de sa Maiesté  
 estoit de nous faire sētir l'agreable douceur  
 d'une tranquillité à toute sortes d'hommes  
 de tel estat qu'il fust; du moins qu'il fist res-  
 pandre & rejallir vne petite goutte de ses fa-  
 ueurs & benedictions sur leur petit troupe-  
 au; Et puis que l'Ocean de tous biens  
 pouroit par les campagnes Frāçoises à tor-  
 rents & à ruisseaux, il leur fut permis de des-  
 cendre la source des ondes cristallines de  
 leur doctrine, & les faire saillir au milieu de  
 France, où elles estoient taries; qu'ils y  
 estoient portez d'un cœur vrayemēt Fran-  
 çois, prests d'obeïr au Roy & luy rendre ser-  
 uice, qu'ilz ne respiroient rien que par ses

volontez; & qu'ilz n'auoiét pour regle que  
 ses commandemēs, que sur les autres fleurs,  
 ilz n'aimoient que le lys; qu'ilz bandoient  
 leurs efforts, & buttoiét leurs pensees pour le  
 bié du public, pour immortaliser le nom de  
 nostre inuincible Roy, & pour accómoder la  
 demeure des Muses, & aduancer aussi le pro-  
 grez des bonnes lettres & de la pieté; que les  
 lettres estoient l'ornement d'un Estat, le  
 soustien d'un Empire, l'œil & le Soleil de  
 ceste Monarchie: que si estoit remise ceste  
 profession, que Paris seule ne debuioit pas  
 iouyr du bien des lettres, & de l'instruction  
 de la ieunesse, mais que maintes Prouinces  
 & maintes villes de ce Royaume deuoient  
 y auoir part, veu que le bien a vn tel naturel  
 qu'il est meilleur plus il se communicque, &  
 se perfectionne en sa bonté.

Le Roy, tres-bon, & grand donneur de  
 biens, les reçoit & les couure des bras de sa  
 clemence, leur ouure sa poictrine pour les y  
 conseruer, & deslors il les place à la Fleche  
 & en d'autres endroits de ce Royaume, leur  
 bastit des Colleges, leur fonde des maisons  
 qu'il dote, gage, appointe aux despens du  
 public ou des deniers Royaux. Esquipez de  
 ces gages ainsi que d'armes & flèches ac-  
 rées & d'une forte trempe, les voicy a nos

portes, mais à couuert sous le nom du Roy, comme sous la cornette de quelque Dieu, & viennent assaillir nostre Vniuersité, qui estoit toute nue, sans secours & sans armes, à la mercy du fer & en butte aux tireurs; les voicy qui annoncent & retentissent de langues & de plumes, comme aux sons des trompettes vn labour gratuit, qui est suivy pourtant du gain & des acquests: destournent les enfans, qui des lieux où ilz sont, venoient troupe sur troupe en ceste venerable assemblée des Muses, qui est comme vne foire où s'estalle & debitte la mercerie des lettres; ils couppent les passages par où ilz arriuoient en ceste ville. Et puis on s'ébahit de veoir l'enceinte & le pourpris de nos murailles si desert, si solitaire, & si abandonné? on s'ébahit de voir la fontaine des lettres sans ondes, sans ruisseaux, sans suc & sans liqueurs? & on ne s'ébahit pas comme ils couppent les veines, & bouchent les canaux où couloit jadis le sang, & cest esprit vital qui grossissoit ces ondes, & on leur paillera nostre vie à garder apres si lasche cours! on leur demandera medecine & remede à l'Vniuersité! qu'ils ont ainsi blessée, meurtrie & mal-menée de telles maladies! qu'ils volent maintenant de toutes parts à



tire-d'aisles, & viennent s'efforer sur le tombeau de l'Vniuersité, qu'ils allōgēt les mains pour prédre l'heritage de la deffūte; le cœur panthois luy battoit encore, & rendoit pres que les sospirs derniers, & neantmoins engloutissoient desia de cœur & de pensee son funeste tombeau, en faisoient les partages, & donnoient la curee à leurs souhaits.

Mais, Dieu mercy, ilz ont esté deceuz de leur attente; il est arriué que le corps de l'Vniuersité, bien qu'il fust assiegé de leurs trouppeaux, a rallié ses forces: ainsi que les roses plantées pres des eaux, rendent meilleure odeur; & que le feu enuironné du froid donne plus de chaleur, ainsi l'Vniuersité a soudain ramassé ce qui luy restoit de chaleur naturelle, & s'est trouué des hommes, qui luy ont appliqué contre les influences malignes de si contagieux astres, qui luy mangeoient le cœur, vn lenitif d'vne vraye doctrine & pieté, & luy ont appresté certains ingrediēts, composez du fin or de leur sçauoir; voicy donc qu'elle reprend son haleine, qu'elle se releue, qu'elle raieunit; & eschappée qu'elle est de ses dangers, elle a trompé les corbeaux qui espioient la proye, dequoy s'apperceuants les Peres de Clairmont ont leur recours à d'autres artifices,

forcent nouueaux deffains, ou plustost praticquent leur coustume ordinaire, ilz se fourrent aux maisons & aux bonnes familles, gaignēt les amitez d'un tas de peuples, font les officieux, les circonspectz, & les respectueux, & changent de nature pour vn temps; les voicy, les voilà en diuerses postures, pirouētants avec leurs baise-mains, compliments, accolades; ceste humeur souple & matoiserie qui va, qui vient, qui vire, selon les temps & les occasions, desbauchāt par presents les plus foibles esprits à l'appetit de quelques friandises venuës de leurs cuisines, engeolent les enfans, les appatclēt & les empatelinēt; ils amusent les autres de leurs belles paroles parfumees & emmieles de mignardises & des attraitz pippeurs de la papelardise; promettent des merueilles, on les oit, on les croit, on se lie à ses Peres, & on attend l'issuë de leurs promesses, & qui plus est encore, taschēt à nous ruiner nous mesmes par nous mesmes, nous font porter les armes les vns contre les autres, tirēt de leur costé par dons & par largesses l'esprit volage de certains remuans, qui mangeoient le pain de l'Vniuersité, & qui trop à leurs aises s'estoient refaits gros & gras en bon point dans le sang & la gresse de la melme Vniuer-

fité; affin qu'à leur moyen le pauvre sein d'icelle fust ouuert à leurs coups & à leurs violences, pour la mettre à loppins & à lambeaux par leurs maximes à deux & à trois ententes, & pleines d'equiuocques, dont ils s'escriment ainsi que de cousteaux qui tranchét des deux bouts; affin qu'on leur ouurit son sanctuaire & ses temples sacrez, où ilz pourroient establir leur Empire, commander à baguette, regner les coudees frâches, & bastir des Palais pour leurs dignes trouppeaux, où ils pourroient aussi couper la gorge & l'herbe sous le pied à des esprits diuins, qui ne venoient au monde que pour l'honneur, & que pour ciuiler la compagnie des hommes, où ils pourroient encore desarmer Pallas, luy oster son harnois, son bouclier, son casque, luy gouspiller le teint, luy barbouïller le visage, & effacer les traits maiestueux de sa face Royale, l'habiller à leur mode, luy donner leurs liurées, en faire vne marotte, vne paillarde, & la prostituer aux volonteiz lubricques d'vne vile canaille, pour la couuer des yeux, & l'empoigner des mains, & la fouller des pieds, elle qui est Vierge, Religieuse, & tousiours venerable, sacree & consacree à la diuinité.

Et partant ilz obtiennent de nostre bon  
Roy



Roy lettres de iussion, qui donnoient liberté de rouvrir leurs Colleges, instruire la ieu-  
 nesse au beau milieu de l'Vniuersité : mais  
 attendant la veriffication desdictes lettres,  
 l'Vniuersité s'y oppose, non moins mode-  
 stement que courageusement, appelle ses  
 Recteurs, les conuie, les coniuere d'espouser  
 sa querelle, & deffendre ses droicts viuemēt  
 & vigoureusement, qu'il est bien raisonna-  
 ble de recourir aux loix & demander main  
 forte pour ouvrir la fontaine de la Iustice,  
 en distiller les ondes sur les feux allumez de  
 leurs combustions, ou pour le moins accoi-  
 fer ces desordres, & faire en telle sorte qu'un  
 feu si furieux ne gaigne pas plus outre. Tan-  
 dis les Peres de la Société, ennuyez du de-  
 lay ne peuuent plus attendre, font venir es-  
 colliers en leur College, & mesme les in-  
 struisent au mespris de la Cour, malgré vos  
 iugemens, en despit de l'Vniuersité, & non-  
 obstant nos oppositiōs, & pour ne pas sem-  
 bler transgresseurs de vos loix, leur don-  
 nent vn sens mysticque, n'enseignent pas  
 eux mesmes directement, mais prennent  
 des Pedanteaux & maistres de village, qui  
 n'estoient pas plustost plantez aux grasses  
 plaines du terroir de Clairmōt, qu'ilz deue-  
 noient grands clercs & grands docteurs, &

estoyent maistres passez en toutes les sciences en vn iour, ainsi qu'en vne nuit, viennent les champignons. Quelle merueille donc, si l'Vniuersité foulée, acrauantee, accablée soubz le faiz des infinis malheurs qu'elle a eu sur les bras iusques au iourd'huy retombe maintenant aux premieres tranches de ses douleurs? c'est pourquoy elle ne redouble pas seulement les accens de ses cris, elle ne deplore pas le teint plombé de deüil l'estat de ses miseres; mais elle inuoque Dieu pere des affligez, elle implore chetiue, les secourables mains des hommes pitoyables; & encore qu'elle soit aux plus fieureux accez de sa douleur, ou luy manquent les forces, elle crie neantmoins à gorge deployee, au secours, au secours, on me pippe, on me vole, & on me violente.

A ceste voix plaintiue, voicy venir les Peres tapis en embuscade; les mesmes Peres qui abbregeoient les iours de l'Vniuersité font les operateurs, se disent medecins, & les conseruateurs du genre humain, donnent des ordonnances, escriuent des receptes contre les maladies, se vantent d'un secret qui peut remedier aux langueurs & foiblesse de l'Vniuersité, & qui la tirera des tenebres au iour, du mal au bien, du tombeau

de la mort dans vn second berceau d'une seconde vie, & que pour mieux nous faire gouster ce bien, ne desirēt rien tant qu'estre receuz de nous, & comme estāt des nostres faire bande avec nous, protestēt qu'ils veulent auoir place chez nous, non pas comme les maistres & les proprietaires de nostre champ, mais comme laboureurs pour le mieux cultiuer; qu'ilz porteront respect comme vassaux & humbles seruiteurs aux peres de familles, il ne leur chaut à quel prix que ce soit, pourueu qu'ils soient receuz; & faites les articles ainsi que vous voudrez ilz s'y obligeront par serments solempnels ils s'y engageront aux despens de leur vie, pour conseruer la vie de l'Vniuersité, obeyront aux loix, souscriront aux maximes, & ensuiuront les coustumes qu'on leur proposera qu'ilz prendront recompence de leurs labours, & comme nous instruirons la ieunesse à prix d'argent, argent qu'ilz employerōt pour accroistre le nostre, deussent-ilz le gagner par rompement de testes, à la sueur du corps, & au trauail d'esprit.

O les douces parolles, ce n'est que miel & sucre, mais si vous les tastez iusques au fond & les sauourez bien, vous les trouuerez plus ameres que fiel, quoy? pensez-vous (bons



Peres) que nous n'apperceuiôs que ce pain que vous nous presentez de vos mains gauches, & ne voyôs pas ceste pesâte pierre, que vous cachez & que vo<sup>r</sup> nous gardez en vos mains droittes, nous estimez-vous encore, si louches, si auugles? quoy? nous tromper encore par tant de faux semblants, & contre-faire encore tant de personages? & pourquoy tant de mines? tant de mattoiseries? on sçait bien qui vous estes, on vous cognoist assez. Voyez-vous le Soleil de ceste Cour qui vous esclaire, qui dissipe les ombres de vos tenebres, & qui veille sur vous, & vous changez encore de couleur à l'obiet de nos yeux? oüy il n'y a couleur de si haute veuë qui ne soit propre pour vos metamorphoses, hors mis le blanc, qui colore & blâchit les ames des François. Dieu nous a fait la grace de lire dans vos cœurs, nous auons les yeux bons & assez clairs-voyants pour descouurir l'issuë de vos menées & de vos singeries; nous auôs en main les fortes chesnes de la Iustice pour tenir arrestez les muables Prothées, & les faire retourner à leur forme premiere.

Et pleust à Dieu, Messieurs, (ie le dis de bon cœur) que nous peussions recevoir chez-nous, en toute seureté, leurs compa-

gnies, que nous peussions aussi leur porter non seulement vn amour fraternel, mais qui plus est vn honneur paternel; mais c'est vne campagne sourcilleuse en montagnes, & vne plaine herissée de rochers mal-aïsez à grimper, car ces villes nombreuses qu'ilz regentent à leur poste, seruent d'exemple & de preuue euidente, que de les receuoir c'est vouloir l'impossible, tant de grâdes Prouinces où ilz sont maistres, tant d'Vniuersitez qui sôt ensepuelies soubs leur ruines, qu'iles ayant mises bas, pillées, desmantelees, au fac à la belace, ont dressé des Palais de leur debris, & sont deuenus riches aux despès d'autrui. Ces Vniuersitez ainsi rauagées donnent vne chaude alarme à celle de Paris, & la mettét aux alteres, aduertissent leur sœur qu'elle deuienne sage à leur exemple, qu'elle tire profit de leurs malheurs, & comme de tout temps, elle les a surpassées d'honneurs, de dignitez, en largeur d'estenduë, & en longueur d'annees, elle leur soit aussi superieure en preuoyance, vigilance & courage, & que non seulement elle preuoye prudemment les malheurs qui la menacent, & qui sont à ses portes, mais aussi les repousse d'un masle cœur & resolution plus que virile, & luy font à scauoir que leur societé est

semblable du tout aux plumes d'Aiglès, qui mangent peu à peu & reduisent à neant les autres plumes sur qui elles sont mises, ou aux riuieres qui semblēt embrasser par amitié les plus voisines Isles, & leur faire la feste, & toutesfois à la longueur du temps les sap-pent, les esboulent, les minent; & les menēt au courant de leurs ondes.

Mais que nous sert d'oüyr leurs deuïs, leur aduis, & aduertissemens? pourquoy recherchons-nous de si loin les malheurs aduenus aux Vniuersitez lointaines? pourquoy en faisons-nous vn roole & vne liste? le malheur est chez-nous & au milieu de nous, ilz estouffent le cœur; ces mesmes ennemis de l'Vniuersité, soubz ombre de remede, luy donnent des bruuages enuenimez du ius de nouvelles maximes, & font infusion de ces venins en la place du sang vermeil qu'ils ont tiré des veines & des arteres de l'Vniuersité: & sur le point qu'ilz se vantoient d'auoir vne Ambrosië & vn nectar si diuin, des restaurās & mets delicieux pour guarir ceste éticque, qui ne faiët que trainer en chartre & en langueur, que gratuitement ils nous les seruiron sans qu'il en couste rien. Ha melchants! les voicy qui la tiennent à la gorge, luy arrachent la langue,



& luy couppent la voix de peur qu'elle ne crie, creuent ses yeux de peur qu'elle ne descouure les enuahissements de leur surprise, mettent la dent par tout, & donnent dans la teste, enveulent à la Sorbonne, l'affrontent, la collettent, & luy font boire assez honteusement mille supercheries. Croyez que l'Vniuersité, oüy le grand corps de l'Vniuersité, seroit y-a long-temps perclus, paralitique, & endormy d'un dangereux sommeil, ne remueroit plus ny bras ny iambes, ce seroit fait de luy, si la Sorbonne n'eust craché ceste rauine de pecquâtes humeurs, qui vouloient empester la teste avec les membres.

Quoy donc? ceste Societé de Iesus, qui se dit le miroir d'humilité Chrestienne, & se l'estime tel, & le vif exemplaire de la vie des Apostres, s'est donc émancipée; s'est ainsi oubliée de son deuoir; tellement negligé son naturel courtois, que de vouloir courir sus à la Sorbonne, ceste Sorbonne, hélas! forteresse imprenable de la Religion, ferme rempart de l'Eglise Romaine, l'ornement & la gloire de ce Royaume, & l'vnicque defence de ses libertez, a osé l'accuser de reproches menteurs, la diffamer, & luy marquer au front vne vergongne remarquable à jamais à la posterité: si leur pouuoir eust

respondu à leur vouloir, appeler ignorants,  
 impudens, imprudens, ceux qui sont les  
 sçauans, les sages, & les simples du monde,  
 Ô tēps! Ô mœurs! tourner à blasme vne sim-  
 plicité au grand scandale de la foy Catholi-  
 que, qui donnera subiect aux religionnai-  
 res d'en faire feu de ioye, corner & clabau-  
 der par tout à perte d'haleines, & le faire im-  
 primer, qu'on a faiēt des prieres & oraisons  
 publicques à Charanton, à la Rochelle, &  
 aux autres tasnières de l'heresie pour la Sor-  
 bonne & l'Vniuersité, detestables horreurs!  
 comme si la Sorbonne n'estoit pas propre-  
 ment ceste Legion guerriere, qu'on appel-  
 loit iadis le foudre de la guerre, non pas d'un  
 Empereur Romain Aurelius, mais des Pa-  
 pes de Rome, qui dardent par le monde le  
 feu spirituel de leurs diuins sermōs, qui font  
 tonner & estonner les peuples au bruit de  
 leurs doctrines, comme au son effroyable  
 d'un roulement de rouēs, qui garantit l'E-  
 glise des flesches acérées que decochent sur  
 elle les desuoyez, leur arrache des mains  
 & leur faiēt lascher prise, qui estouffent en  
 somme les flambeaux de discorde & de diui-  
 sion, que darde l'heresie au sein de nostre  
 Eglise: comme s'il se trouuoit d'autres pilo-  
 tes sur le rond de la terre plus propres à te-  
 nir le

nir le gouvernail, & le timon de la nacelle du Prince des Apostres, que les Sorbonistes? comme s'il s'en trouuoit de plus habiles, de plus laborieux & de plus exercez au fait du nauigage spirituel, qui peuuent allegrement eslancer les esclairs impetueux de leur tonnerre en la vieille chaloupe des Calvinistes, oster le gouvernail à Calvin, precipiter du mast vn du Moulin, couper les chables qu'empoigne vn de Mornay, & faire sauter Beze haut en bas de la prouë, & faire couler à fôds au gré de la marine ceste battelee d'Huguenots, qui escument la mer des Catholiques, accrocher leurs vaisseaux & s'en rendre les maistres, rompre les aui-rons entre leurs mains, & s'armer de leurs armes à leurs confusions; & toutesfois ces venerables Peres, selon leur modestie accoustumee, en font leur fable, le iouët de leurs contes, & de langues & de plumes, se vantent qu'ilz portent seuls dans les plis de leurs robbes l'amitié du prochain, qu'ilz en sont tous cousus, & creuent en leurs pan-neaux du desir incroyable de seruir au public, & du mespris des Sorbonistes vont mandians leur gloire.

Il est ainsi, Messieurs, & nous l'endurons qui sommes Catholiques, nous patientos



nous qui sommes François! & nous qui sommes de l'Vniuersité! nous n'en parlerons pas? Catholiques, le sommes nous? où est donc le zele que demande l'Eglise? & où ceste ferueur que nous luy portions au temps ce nos ayeuls? François, le sommes, nous? ou la fidelité & deuoir maternel deuë à nostre patrie enuers tous & contre tous? & sommes-nous de l'Vniuersité? où est le souuenir de tant de priuileges, de tant de passe-droicts dont nos Roys tres Chrestiens nous ont Royalement aduantagez sur toutes nations.

Ceste belle Societé a vn specieux titre, & ne porte en la bouche que l'interest du peuple, que bien public, qu'vtilitez publiques, voila les consequences de leurs discours.

Mais si leurs actions, leurs pensees, leurs paroles ne tendent qu'à ce but, il sera donc permis dorefnauant à des suiets de secouër le ioug de leur obeïssance, & rompre le serment de leurs fidelitez,; il sera donc loisible de semocquer des arrests d'vne Cour, & des Edicts d'un Roy, on pourra librement abuser & piper la grosse populace, enuoyant du Iappon force nouveaux miracles, & donner le martyre, le Ciel, & des autels à tels faiseurs de miracles, encore qu'ilz

ne soient pas canonisez, bref renuerser le bel ordre des anciennes Vniuersitez, non seulement mespriser les decrets de Sorbonne, mais aussi les blasmer, les outrager & déchirer de lāgues; il sera donc permis de ruer tout par terre, de fouler tout aux pieds, afin que ceste ligue partizanne des Peres, qui plantent les flambeaux de leur Theologie aux quatre coins du monde, mettent le feu aussi aux hayes & buissons où est caché le vice, dessechent les relantes liqueurs des mauuaises doctrines. C'est la verité mesme, c'est cela mesme en somme, qu'hier la Martilliere, par qui parle Themis, & qui est vn des ornemens de ce barreau, recitoit d'Ozorius, que sur la fin du monde on verroit naistre vne Societé, qui porteroit vn nom tout nouveau, tout estrange, & dont iamais pas vn, iusques à eux, n'auoit osé s'attribuer le titre, qui rabaisseroit bien, comme il parle, le caquet de ces presumptueux Regents, enflez d'orgueil, & bouffis d'arrogance, qui feroiēt perdre les lettres de maistrises & belles doctorandes des gros chapperons fourrez, qui n'auroiēt pas plustost paru sur la terre, qu'ainsi que le Soleil eclipse la lumiere des petites estoiles, quand il se leue sur l'Orizon, ainsi à leur presence les autres compa-

gnies, quoy que tres legitimes, cimentées & fondées sur l'vnion des cœurs, creueroiēt en peu d'heure, seroient éuaporees, esuanoüyees, dissipées en fumées, & seroient renuoyees comme bastardes.

Ilz se vantēt desia d'auoir acquis ce point par les terres Chrestiennes; & à la verité ilz ont chassé les plus beaux esprits, & les testes mieux faictes de leurs propres maisons, se fourrants par tout, à corps perdu, & visiere baissée, (comme ilz sont fort entrants) ont estouffé au berceau, à la plume, au duuet vne ieunesse qui promettoit beaucoup, les ont enforcélez de leur puante haleine, ainsi qu'une broüée qui ternist de son hasle le teint & le lustre des perles, ont osté les moyens aux plus lettrez de paroistre en public, & se faire cognoistre, il n'y auoit que l'Vniuersité de Paris qui seruit de retraicte & de lieu de franchise, pour là distribuer à tous venants leur grād sçauoir, & faire le partage de leurs belles vertus: mais voyants qu'elle estoit comme vn rocher qui arrestoit le cours de leurs vaisseaux, (rocher où viennent eschouer les escueils qui la chocquent) bracquent tous leurs canons, pointent tous les engins de leur barterie de ce costé, s'estimēt trop heureux, si nous faisant accroire qu'ilz



nous veulent sauuer, nous conseruer, faire  
 bande avec nous, accablent toutesfois nos  
 veilles & nos labeurs d'un tourbillon d'en-  
 uie, de haine & de rancœur; s'ilz contrai-  
 gnent vne fois ceste Princeſſe des Vniuerſi-  
 tez à venir demâder l'aumosne, comme vne  
 pauvre gueuſe, aux portes de Clairmont, ti-  
 rer de leurs finances, gages & ſalaires pour  
 nourrir les enfans; ô honte de nos ſiecles!  
 que tu-es miſerable pauvre Vniuerſité! qui  
 autrefois remplie d'une fourmilieſe d'eſco-  
 liers, te faiſois admirer aux nations du mon-  
 de, qui autreſtois de ſi large eſtendue te fai-  
 ſois reſpecter, toy, qui par ta vertu, doctri-  
 ne & autorité, eſtonnois tous les peuples,  
 que tu-es fortunée d'eſtre ainſi le iouët, non  
 pas du temps, non pas de la fortune, non  
 pas des deſtinees, mais de tels peres, & à la  
 veuë du ciel & de la terre. Ha, Meſſeigneurs!  
 ha François! ha Paris! les pouuez-vous bien  
 voir? les pouuez-vous endurer? pouuez-  
 vous porter l'eſpaule, ou pouſſer à la rouë  
 de leurs commencemens.

• S'il eſt beſoin de remettre les lettres, qu'on  
 les remette, mais ſans bleſſer nos reputa-  
 tions; ſ'il eſt beſoin de redonner vie & vi-  
 gueur aux Muſes, qu'on leurs redonne, mais  
 non pas à la honte, & aux deſpens des Fran-

çois. C'est à vous, Messieurs, qu'appartiennent ces chefs-d'œuvres, acceptez-les, c'est pour vo<sup>r</sup> ceste gloire, & ce titre d'honneur; mais vous Parisiëns reservez ceste grace à vostre chere ville. Quoy? vostre Vniuersité recommandable pour son antiquité, & admirable en sa police, & reglement bië compassé de ses classes nombreuses, venerable & celebre en ses temples sacrez, qui regorgent d'hommes tres-accomplis, & qui n'ignorent rien, n'est-elle pas capable, & digne de telle charge, dittes-moy donc, où est-ce, ie vous prie, que la mer des sciences avec son flux & reflux, peut courir pl<sup>u</sup> à l'aise & plus commodément, peut mieux tourner en rond, & desuelopper ses ondes qu'en ce grand Ocean de l'Vniuersité, sur l'eschine duquel, tant de grands personages singlants à pleines voiles, nous charient les riches marchandises de leurs doctrines, pour en faire traffic & cōmerce par tous les coins du monde au grand bien de la France.

Qui voudroit renfermer le haut pays de l'intellect humain, & les claires fontaines de l'Oratoire, ou coulent les parolles avec les choses; qui voudroit reserrer les secretes riuieres de la Philosophie, qui s'esbranchët en ruisseaux, & ies font reiallir au sein de la

nature; ou ceste pleine mer de la Theologie qui n'a pour borne que soy mesme; qui voudroit renfermer mer, fontaines, & fleuves en ces petits esgouts de leurs escholes, que vous diriez proprement estre quelque maréztz, ou l'eau dort & croupit; que nature à produit plus pour faire vcautrer & grenoüiller ces gros esprits de terre, tels qu'estoient ceux de l'ancienne Bœoce, que pour estancher ceste brillante soif des sciences qui consomme les hommes.

¶ Nous voicy en personnes, nous Professeurs de l'Vniuersité, nous voicy tous en armes, le harnois sur le dos; prestz de donner le choc à ces Reuerends Peres, non par ruses, ou par brigues, non par mattoiseries, mais armez de vertu, d'industrie, de doctrine, de cœur franc ouuert; ça qu'on les voye donc sur les rangs ces plus grandes lumieres de leur Societé, (s'ilz peuuent auoir autre lumiere que par la reflexion de l'Vniuersité,) qu'on voye ces gens qui sagottent leurs liures, & les entassent les vns sur les autres, ainsi que des montaignes pour monter dans le ciel de la sagesse, & debusquer de leurs throsnes les Deitez gardiennes de l'Vniuersité, qu'on les voye bondir de leurs cauer-  
nes, & qu'ilz monstrent la patte ces gene-



reux lyons, qui iettent le feu par les nazeaux  
 & par la gueule, qui ne respirent rien que  
 sang & que carnage: on verra si les Geants  
 ne craignent pas les foudres de Iuppiter  
 Academicien; on verra si ces lyons affreux  
 ne trébleront pas, ne tremousseront pas de  
 crainte & de frayeur au chant melodieux  
 d'une Vniuersité Frâçoise. Je ne souhaite-  
 rois, Messieurs, qu'une chose, que les Je-  
 suites missent bas le pourpoint & entraissent  
 en lice pour se battre espées nuës, avec nous  
 autres qui sommes en chemises: mais on les  
 faiët combattre eux qui sont plantureux en  
 biens, en fiefs, en domaines & en rentes, eux  
 qui ont l'aduantage par dessus nous, & qui  
 sont dans le grain iusques à la gorge, on les  
 faiët chamailler avec les gens de l'Vniuersi-  
 té, qui maigres, haures, hideux, ne mon-  
 strent que les os comme vn Squelette, ne  
 font que viuotter, & languissent de faim sur  
 les bras de leur mere; quelle apparéce, est-ce  
 partie esgalle? sommes-nous leurs pareils?  
 Toutesfois nous voicy les armes dans le  
 poing à l'espreuue des coups, nous voicy  
 sur les rangs pour faire teste aux escarmou-  
 ches de ses cheuaux legers, bien attaché  
 mieux deffendu; qu'on nous laisse faire,  
 qu'on nous laisse demesler ceste fuzée, vous

verrez comme tout reüssira à vos contentemens, au profit de l'Estat, & au progrez des lettres.

Non, non, il n'est plus question de bien discipliner vne ieunesse, en commettre la charge, le soin, la preference à l'Vniuersité, il y va de l'Estat, il y va de la vie de nostre Roy, c'est vn faict qui importe à la Couronne. On dict que Mæccenas admonnestoit Auguste de mettre la ieunesse soubz la conduite de Precepteurs qui fussent affectionnez à l'Empire Romain, & de faict ces guerriers, & ces preux conquerants, victorieux du monde, faisoient instruire à part, la ieunesse de France en des lieux retirez pleins de bós pasturages, ou peu à peu ils leurs faisoient goustier & naturaliser dès l'Auril de leurs ans vn amour éternel de l'Empire Romain, & s'ilz apperceuoient poindre & pousser vn petit grain de liberté François, le pettilloient aux pieds ou le destracinoient; En cas pareil, à qui plus iustement & plus asseurement donnerez-vous la charge de la ieunesse, qui groüille dans la France, comme essains de frelons, qu'aux Professeurs de l'Vniuersité, qui n'ont ames & vies, que pour la France? France qui les anime & qui les viuifie comme leur air, leur Ocean, leur

élément, leur Ciel; & ne demandent vie pour l'Vniuersité, qu'affin qu'elle soit tousiours vn corps de garde, & vne sentinelle, ou mis en garnizon, ilz puissent iour & nuiët faire le guet, pour la protection & manutention des sacrees Maiestez, pour dresser de bonne heure les ieunes entes à l'amour de l'Estat pour les catechiser en la crainte de Dieu, aux charitez chrestiennes, & nommément en la fidelité enuers les Roys.

Pour ces raisons, nostre bon Roy qui aimoit ses suiets vnicquement, vn peu auparauant que son ame celeste eust monté dans le Ciel, par la playe mortelle qu'il reçeut dans le sein du cousteau malheureux de cest infame traistre: il estoit en parole de remettre sur pieds son Vniuersité, n'estimât pas assez qu'une si chere fille, & si fidelle aux Roys eust la vie simplement, mais vouloit que sa vie fust honorable, magistrale, Royale; il auoit déclaré sa bonne intention à ce brillant Soleil du clergé François, tres-illustre Prince du sacré consistoire des Cardinaux, Monseigneur du Perron, en qui, comme il auoit vne grande croyance, il auoit mis le soin, il s'estoit reposé, pour éterniser son nom par le courât des aages, & comme il le voyoit iudicieux, & grand amateur des



lettres & des hommes lettrez, il luy recom-  
 manda particulièrement l'aduancement &  
 l'expedition de cest ouurage.

La voicy, Messeigneurs, la voicy elle mes-  
 me, qui se presente à vous la larme a l'œil, &  
 vous coniure tous par les ombres sacrez  
 de son feu Roy, nostre second Sauueur  
 qu'elle n'en vienne pas là, que de my-  
 partir sa gloire, auoir des compagnons  
 & des partageants, & appeler à l'ayde  
 ceux qui sont si hauts & puissants seigneurs  
 qu'on ne les peut borner, si honorables  
 qu'on ne les peut imiter, si remplis de meri-  
 tes qu'ilz n'ont pas leur pareil, faiçtes que  
 ceste Vierge demeure immaculee & impol-  
 luë, & qu'elle soit capable de receuoir vn  
 iour l'agreable rosee des douces influences,  
 que doit verser la main de ce grand Cardi-  
 nal, vray nourrisier des Muses; & qui, luy  
 mesme seul, les ressusciteroit, s'il arriuoit  
 qu'elles fussent au tombeau.

Elle ne demande pas pour ses chers nour-  
 riçons des recompenses telles qu'une ran-  
 çon de Roy, qu'un Peru, ou que des mines  
 d'or, non pas des Baronnies, des Comtez,  
 des Abbayes, elle ne brigue pas des succes-  
 sions, elle n'est pas Charlattanne, elle n'a  
 point de charmes, elle ne iette pas de poul-

dre aux yeux pour espuiser les coffres, ou tirer des presents de la main d'un chacun, & prendre à toutes mains; seulemēt vous supplie en toute humilité, qu'elle ne croupisse pas en l'ordure ou elle est, qu'elle, qui tant de fois a esté deprimee, ne soit pas opprimée, elle qui tant de fois a esté combattue, ne soit pas abbatuë sans espoir de ressource; qu'on luy tēde la main pour luy tirer la teste hors du fumier, qu'elle ne combatte plus sās armes avec tant de gens d'armes, qu'elle ne face iamais accord & alliance avec ceux, qui malins lors qu'elle choppe vn pas; luy font glisser le pied; & sur le point qu'elle tombe, precipitent sa cheute.

Mais quand à vous beaux Peres, Peres de modestie, que ne vous tenez-vous en vos limites? quel prurit vous demange? qu'elle si grande enuie d'enseigner la ieunesse vous espoint, vous chatoüille, vous fait sauter aux nuës? pourquoy venez-vous pondre dans nos paliers, & couuer sur nos œufs si opiniastrément? est-ce pour nous esclorre des Espreuiers, des Milans, des Autours, au lieu de vrays François? que si c'est vostre enuie, & vostre affection, pourquoy faictes-vous guerre si rude & si cruelle? pourquoy sans dire hola, enfoncez-vous les portes à grāds

coups de marteaux? en quoy vous a-elle of-  
fencé pour la haraſſer ainſi, la tirailler, & la  
perſecuter, la tirer aux cheueux, & procurer  
ſoubz main ſa perte & ſa ruine? allez donc ie  
le veuts bien, ſi vous penſez raffaſier voſtre  
gloutonne faim des moëllons & des tuilles  
de nos maiſons, abbatez les, ſi vous penſez  
eſtancher voſtre ſoiſ de noſtre ſang, ouurez,  
percez, & eſpuiſez nos veines, emportez  
tout, ſaccagez tout, pillez & rauagez com-  
me à la picoree; emportez chez-vous les  
cendres & les tizons de nos embrasements;  
au moins ſi vous auez quelque reſſentiment  
de la deuotion de nos ayeulx, ſi vous eſtes  
touchez de quelques conſciēces, pourquoy  
renuerſez-vous les mauzolees d'éternelle  
memoire de nos ayeulx? ſi vous aués encore  
quelques fleurōs de lys grauez au fōd de l'a-  
me, pourquoy aſſaillez-vous ceſte Vniuer-  
ſité, qui deſſend viuemēt les droicts & priui-  
leges du Roy des fleurs de lys? & ſi vous ho-  
norez ſa Maieſté d'vn amour cordial, pour-  
quoy venez-vous fondre ſur ſon ſang, ſur ſa  
race, & ſur ſes creatures, comme ſur vne  
proye?

Le veuts que l'Vniuerſité ſe ſoit veuë re-  
duite en ſi piteux eſtat par le malheur du  
temps, par le flux & reflux de nos guerres



ciuiles, & ſpecialement par les ſupercherics  
de nos cōiurateurs ; mais la faut il reguarir,  
qu'on la reguariffe donc, non par la main de  
ceux, qui la feront languir à hocquetz & à  
ſanglots, d'vne lente poiſon au lieu de luy  
dōner vne forte rheubarbe, dāſeront apres  
ſur le tombeau de la pauvre deffunte, & ſe  
piafferont d'auoir affiné le peuple François,  
bontif, perſuaſif, & qui croit de leger.

Eſt-il donc vray qu'il la faille tousiours  
fouller, ſi iuſques auourd'huy elle a eſté  
foullée ? la faut-il derechef matter & matti-  
ner, ſi elle l'a eſté par cy deuant ? & la faut-il  
bannir, pour ce qu'elle n'eſt plus dans leurs  
eſprits ? eſprits, ou ſont fleſtries les odorātes  
fleurs de la doctrine, & où ſont bazānez les  
lys François. Ie me paſme, Meſſeigneurs,  
quand i'entends les ſouſpirs, les'plaintes, les  
griefs de l'Vniuerſité ; ie meurs à petit feu  
quand ils viennēt ſonner iour & nuict à mes  
oreilles & troublent mon repos ; faut-il que  
ie m'en aille, dit-elle, & que ie rende l'ame  
ſur les bras de mes domeſticques, ſans pou-  
voir florir comme le reſte du grand corps  
de l'Eſtat ? Quoy fourrager mes terres à ma  
veuë, à mon ſceu, me raurir l'heritage que  
m'ont laiſſé mes peres, qu'on m'arrache des  
bras mes fauoris, qu'on les enterre viſs.

Adieu donc , ô Paris , Adieu mes bons  
 enfans , Adieu pour vn iamaïs, vous qui  
 auez conquis l'Empire sur les lettres , & qui  
 estes logez dans ce petit recueil du monde  
 vniuersel, sauuez vous mes mignons , puis-  
 siez-vous estre heureux, & viure en allegres-  
 se, face le Ciel benin que ceste ville vous de-  
 meure immobile, & que mon cher pays me  
 demeure obligé; ie me retireray & m'en iray  
 si loin qu'on ne me verra plus; baste , si ie ne  
 puis cultiuer, pollicer & regler cest Estat de  
 bonnes lettres , aumoins n'y verray-ie pas  
 regner vne asnerie, vne ignorance & vne  
 barbarie; ô mes vaines coruees qu'estes-  
 vous deuenus?

Où estes-vous allees mes esperances? vous  
 n'estes eschappees, ha mes belles péeses vo-  
 ne m'auez de rien seruy, c'est pour neât que  
 ie vous ay pourpensees, sera-il dit, que moy  
 qui courbésoubz le faiz des guerres ciuiles  
 reprenois haleine, & ne respirois plus que  
 l'odeur de lys Frâçois, pour porter derechef  
 dans mes flancs maternels tant de bons ci-  
 toyens que i'ay stilez, façonnez, aguerris  
 pour tenir rang en ceste Republique, & que  
 i'ay esleuez, aux plus hōnestes charges, plus  
 apparêtes, & les plus releuees de ceste Cour,  
 qui ay plongé les ames heroïques des Prin-

ces, des Roys, des Empereurs, dans la mer des sciences; sera-il dit qu'après auoir faict tant de bien ie ne ressentepas au fort de mes angoisses la secourable main de tant d'Altelles, de tant de Seigneuries, de tant de Maiestez? où est ce Parlemēt à qui i'ay donné à tetter mes mammelles? ou ces grands Caualliers qui s'estoient enroollez soubz la banniere de ma Pallas, pour esbaucher les premiers coups d'essay de leurs apprentissages? ou le parler François? ou les esprits François? Hé! quel mal ay-ie fait pour estre condamnée, non par quelque destin ou diuine ordonnance, mais par l'aduis de ceux que i'ay nourris, à receuoir au sein les poisons, les assauts & les tranchans cousteaux de mes ennemis iurez?

Mais pourquoy m'arresté-ie si longuemēt à escouter les plaintes de l'Vniuersité? ne voy-ie pas à mes yeux des Deitez qui ne sōt pas contraires à ma fortune, qui me font signe d'esperer mieux, de filer plus doux, recalmer mes bouillons, & rasseren l'œil? Je vous regarde donc, Messieurs, vous qui estes nos Iuges incorruptibles, ie me tourne vers vous, & avec moy toute l'Vniuersité en corps fiche les yeux sur vous, & sur le rang que vous tenez icy, regardez en pitié la fille

ainée



aisnée de nos Roys tres- Chresttiés, qui prosternee à vos pieds a telle confiance en vos faueurs qu'elle s'assieure, que plus ses ennemis gagneront de credit enuers le populaire par l'importunité de leurs brigues, & le patois de leurs mugueteries courtilanesques, plus vous les assisterez de vostre auctorité.

C'est ce qu'elle demande, non à greffe d'argent, qui n'y est que trop court, non par corruption, elle n'y employe pas sa dignité qui est toute affoiblie, elle ne fait pas môstre de sa grandeur par l'entreiect de si longues années, mais elle faiët voler le gros de ses prieres, elle verse des larmes, baisse la veuë, estalle ses haillôs & l'équipage honteux des gueuseries dont ilz l'ont affublee; la voicy destrouffee pour attédrir vos cœurs; voyez comme hardiment elle se iette icy au sein de la Iustice, & implore vos bras iusticiers, & vos mains droiturieres, d'auoir compassion de ses miseres.

Je suis icy, Messieurs, Deïtez que i'adore, Deïtez venerables de ce temple sacré; tutrices inuincibles des libertés Frâçoises, ie vous y coniure tous au nom de Dieu, par les ombres heureuses, & à nous fauorables, du grâd Henry, qui fut iadis le Pere de ceste

France par ses dernieres volontez, lesquelles  
 les vouloir enfreindre, c'est vn peché, vn cri-  
 me, vn sacrilege; par le sang de nostre Mo-  
 narque Louÿs, que vous auez en garde; par  
 la vie immortelle de nostre tres-sage, tres-  
 vertueuse & tres-puissante Reyne, à qui vous  
 deuez donner toute assurance; par ce pre-  
 mier Prince du sang Royal que vous voyez  
 icy, ce tres-illustre Prince, tres-digne reiet-  
 ton du tige des Bourbons; par le salut que  
 vous procurez à la France, par l'affectiō que  
 vous luy portez; par l'honneur que vous  
 luy rendez; mesme par vos enfants, dont  
 principalemēt il s'agist en ma cause: Je vous  
 coniure encore vous-mesme par vous-mes-  
 me, si vous voulez vous immortaliser, & bu-  
 riner vos noms aux temples de memoire:  
 ostez, ostez pour vne bonne fois le mani-  
 ment des lettres à ces profanes mains, & re-  
 baillez l'Empire des lettres à la Princesse  
 des Vniuersitez, & remettez les filles entre  
 les mains de leur mere, & ne permettez pas  
 que la taye & chassie des nouuelles doctri-  
 nes couure les prunelles, le blanc & le cristal  
 des yeux François, baïse leurs regards, ou  
 les face veoir troubles, ne vaut-il pas bien  
 mieux que l'Vniuersité sorte encore hors de  
 soy, & tressaille de ioye au recit de la Cour,

au bruit de vostre nom, & au seul souuenir  
 de vos louanges? vous cueille des lauriers  
 verdoyants à iamais, pour couronner vos  
 chefs, graue à lettres d'or vos grands meri-  
 tes sur la voûte des Cieux, que tout le mon-  
 de serue d'Echo à sa voix, qu'un nouuel or-  
 dre de Religieux tous frais paistris, & de  
 nouvelle impression, qui ne retiennent  
 rien du naturel François, & se dispen-  
 sent des regles monastiques, pour se van-  
 ter par tout, corner & trompeter à pleine  
 teste, au peril de la France, à la ruine des Mu-  
 ses, quoy que s'en pleignent toutes sortes  
 d'Estats, tous monasteres, toutes professiōs,  
 que par vos iugements, leur Diue Société  
 auoit entré chez-nous, que l'Vniuersité  
 avec les bonnes lettres auoit donné du nez  
 en terre par vos arreſts, & que l'air de vos  
 souffles auoit fleſtry, fané, pourry ce  
 troisieme fleuron des lys sacrez.

Si toutesfois vous auez arreſté en vous  
 meſmes, auez deliberé de permettre aux  
 Iesuittes de disposer de l'Vniuersité à leur  
 plaisir, au moins, au moins, Messieurs,  
 desployez nous vos pourpres, eſtédez nous  
 vos robbes au prealable, receuez dans vos  
 bras ceste Vniuersité, qui va rôber, receuez  
 les ſouſpirs, & les derniers hocquets de vo-



estre mere qui est en agonie, & qui tire à la fin,  
 & apres telle cheute arriue qui pourra; sa-  
 che pourtant le peuple aux siecles à venir,  
 cognoissent vn iour ceux qui viennent apres  
 nous, non pas par nos histoires, non pas par  
 le tissu de nos narrez, qui pourroit bien,  
 peut estre, viure l'aage du monde, mais par  
 vous-mesme; apprennent pour iamais les  
 nations du monde; entendent ces nouuel-  
 les encore vn coup, & s'en estonne **QVE**  
**NOVS N'AVONS PAS MANQVE A LA REPV-**  
**BLIQUE MAIS QVE LA REPVBLIQUE NOVS**  
**A MANQVE.**

**F I N.**

